

國學基礎
建炎以來朝野雜記 下
本叢書



興州。而浩兼金房。開達安撫使。遙制夔路及京西三郡。乾道初。金州並屬東路。而守臣但兼管內安撫司。元年夏。武順改判興元。朝臣以其遙制西路軍馬爲不便。乃權合東西爲一路。以吳爲安撫使。而東帥王權改知洋州。兼管內安撫司公事。吳薨不改。淳熙元年。吳武穆爲興州統帥。李叔永守興州。會湯朝美乞分利州東西及金、襄、荆、廬。揚爲七路。各置文武二帥。叔永方申明閒。而朝美得罪。事遂寢。五年。復分利州爲兩路。以挺帥西路。兼知興州。紹興五年夏。挺卒。張詔代之。復合爲一路。而詔但兼知興州。過興元。章德茂侍郎爲帥。議損其禮。詔知之。卽聲言已辭免兼郡。不得入銜。遂抗禮分庭而去。蓋趙子直、邱宗卿共議。本以削武興之勢。而論者或以爲關外四郡。旣屬興元。戎司不能令緩急。恐失事機。會詔遣閒卒出境。而知西和州王季明。愬械繫之。趙資政德老爲制帥。罷季明。慶元二年秋。復分東西兩路。六年秋。郭杲代爲帥。嘉泰四年秋。吳曦繼之。開禧中北伐。又以曦兼四川宣撫副專兵。比曦之反。凡所出僞命。皆以宣撫司號令行之。由是川蜀一切稟承。無敢異者。故知子直、宗卿削武興之權。其慮甚遠。猶得祖宗遺意。如德老所見特淺耳。

趙德老說郭杲定策

趙子直初議定策。遣中郎將范仲壬告殿帥郭杲。仲壬初以國事艱難。告之不應。又以忠義動之。又不應。仲壬不得已。屏人起立。具以西府意達之。又不應。仲壬乃還。子直知不可。遂請趙德老尙書往見杲。諭指

德老謂臬曰。彥逾與樞密第能謀之耳。太尉爲國虎臣。此事專在太尉。臬未及言。德老變色責之曰。太尉所慮者。百口之家耳。彥逾盡誠以相告。而太尉了不見荅。卽西府有問。何以復之耶。子明徐曰。致意樞密。領鈞旨。事然後定。其後勳策首拜子明節度使。德老有怨言。乃亦除端明殿學士。

金字牌

雖黃青字牌。黑漆紅字牌。

近歲郵置之最速者。莫若金字牌遞。凡赦書及軍機要務。則用之。仍自內侍省遣撥。自行在至成都。率十八日而至。蓋日行四百餘里。乾道末。有旨令樞密院置軍期急速文字牌。雖黃青字。日行三百五十里。八年十月十三日指揮。

淳熙二年。尙書省又置緊急文字牌。亦如之。然率與常遞混淆。故行移稽緩。紹興末。趙子直在樞密。乃改作黑漆紅字牌。奏委逐路提舉官催督。歲終校其遲速最甚。以議賞罰。四年十月二日指揮。明年。尙書省亦踵行之。仍令逐州通判具出入界日時狀申省。五年五月二十三日指揮。久之。稽緩復如故。余在成都。見制帥楊端

明有命召。以丁卯歲十一月二十九日降旨。而戊辰正月。未旬方被受。是日行纔百餘里耳。紹興末。邱宗卿爲蜀帥。始創擺舖。以健步四十人爲之。歲增給錢八十餘緡。以初三、十八兩遣平安報。至行在。率一月而達。蜀去朝廷遠。始時四川事。朝廷多不盡知。自創擺遞以來。蜀中動搖。靡所不聞。凡宗卿劾疏中所言。皆擺遞之報也。自後私書叢委。每遞至百數。由是往來稍踰期。自成都而東。猶不過月。自行在而西。或三十五六日云。

嘉泰開邊事始

嘉泰三年冬。金國盜起。增戍積糧。又焚襄陽榷場。蓋懼朝廷乘其隙也。朝廷聞其事。卽起張肖翁參政。帥淮東。程東老樞密帥淮西。蓋以肖翁揚州人。東老池州人。欲使護鄉井也。又起邱宗卿侍郎。召四明。以防海道。起辛幼安大卿帥浙東。時武帥鄭挺在襄陽。邊釁開。懼不能任。力求去。乃召還行在。旣又轉一官知婺州。于是文臣無肯行者。遂以李奕爲荆鄂副都統制兼知襄陽。奕與其兄弟爽言世將家。皆爲戎帥。時東老父喪未免。力辭。改命廣帥薛象先侍郎。而象先不行。畱提舉佑聖觀。遂命宇文挺臣侍郎代之。辟置參機。皆非常制。又徙幼安以次對守京口。起趙德老資政。守四明。出許深甫知院。守金陵。深甫不欲行。乃命宗卿以直學士院代典畱鑰。其開邊蓋自此始。

李季章論邱宗卿不當罷督府

邱宗卿之罷。江淮督視也。命由中出。執政不知之。李季章在都堂爭之。侂冑不納。季章曰。凡舉大事。未論行事之是非。先觀人心之向背。邱宗卿有人望。奈何去之。侂冑變色曰。方今天下只有一邱宗卿耶。因拂袖而起。

葉正則不肯草出師詔

韓侂冑將舉兵。先以葉正則直學士院。蓋藉其名使草出師詔也。正則諭其意。堅辭至三四。不受。于是用

李璧草之。葉正則云。正則既辭。又欲命魯鴻父。漸以少蓬權直院。鴻父亦辭。遂止。

董鎮言楊侍郎未肯通情

武興之亂。時人記錄者。有新舊安西樓記。安觀文靖蜀編。宣撫司準前差。遺胡西仲編。耆定錄。長沙板行。不得姓名。海濱漁父記。

開。沔州。板行。楊巨源自敘書。劉閣學士。益昌士人撰。楊巨源傳。武臣季琪撰。李好義誅曦本末。李好古自記。復四州

本末。李好古自記。實入僞官人數。李好古自記。李好義行狀。白子申撰。平蜀實錄。楊君玉撰。新沔見聞錄。不得姓。字切齒錄。士人正

固陵錄。李直院。李允編。毛氏寓錄。茶馬司幹辦公事。毛方平撰。公議榜。成都府學士人撰。佚罰錄。朝奉郎趙公宅撰。而士大夫之在新沔者。又

或有曰。錄辨汗等書。最後西陲泰定錄。乃盡采而輯之。取舍是非。一從公論。其本末亦粗備矣。然必見于

簡牘者。然後登載。故雖時人所傳。其事甚播者。有未之及焉。曦之遺諸貴人書也。楊尚書獨深止之。曦不

悅。再與費資政書略云。成都侍郎獨不相察。使曦不從。權濟難就。其和議。北人深入。何以爲計。相公可爲

問之。蓋費公所荅曦書。其詞猶婉。而楊公之書。其語甚切。故也。余在田里。見四路行移。獨成都安撫一司

不去開禧之號。時二月初矣。爲錢引事十六州十六縣。各。大墨榜一印。榜凡六十。其後董鎮誅。得其遺曦書稿。有云。楊侍郎未肯通

情云。

安觀文誅曦勞順

淳熙末。安觀文爲文州漕官。有薦于吳挺者。檄兼利西安撫司簽廳。時彭人蘇熙之爲安撫司幹辦公事。

以文墨自許。傍人無如己者。挺之館客有李姓者。挺子盱之外姻也。德壽宮慶典。李爲之草表以賀。表文中有揚命二字。旣行矣。熙之一日。挾尙書以進。謂挺曰。導揚末命。此顧命中語。奈何用之。挺大驚。追之不及。由是李與盱皆恨之。未幾。趙德老來蜀總計。舊例。西帥遣屬官一員往迓。則計使舉以京秩。熙之旣爲盱李所恨。乃共薦安公代之。德老見之甚喜。他日從容謂曰。太尉統衆六萬。得毋例有虛籍者乎。安公不敢盡言。則曰。某所若干。某所若干。以實論之。可五萬三四千人耳。居數月。德老以書來曰。太尉忠誠如此。曷若損六千人之虛籍。寬四川之重賦。不亦可乎。挺得書。謂人曰。趙少卿入蜀尙新。安得知吾虛實。此必安丙告之耳。乃大怒。盱李共爲解。遂已。未幾。安秩滿入都。因爲蘇代。挺記其前事。欲拒之。盱李乃言曰。使其果有是。勢當自疑。今調此官以來。可亮其無他也。安公爲人警敏。凡事盡力。挺更喜之。爲延譽于諸司。改秩而去。及曦爲殿帥。安通判隆慶府。又遷知大安軍。比軍興。首辟隨軍轉運。旋以救荒有績。復遷一官。爲朝奉大夫。逮其稱王。卽除丞相。長史都省事。俄楊李之議合。安公遂決策誅之。蓋居不疑之地。操可致之資。其勢順也。天之佑宋。夫豈偶然哉。

蜀士立功立節次第

武興之變。立功者安觀。文爲之主。楊巨源。李好義。倡率忠義。次之。李貴。手斬逆賊。又次之。若李好古。安癸仲。楊君玉。李坤辰。張林。朱邦寧。之徒。協謀舉事。又其次也。立節者陳待制。咸爲之首。史次奉薰。目避僞次。

之。大安軍軍李國博與宗棄郡而去。又次之。若壬釜。總領所主李道傳。蓬州州學教授皆不受曦之招。又其次也。
楊泰。羅江縣丞鄧性善。竹縣尉程遇孫。陵縣知母安之源。龍游縣令文俱。眉州司參軍宋子欽。金州都統劉端友。總領所措劉翊之。興道縣丞劉靖之。監成都府楊汝明。成都府觀察推官張方。普州州學教授宋大酉。昭化縣主簿楊修年。簡州州學教授梁梓。隆州司詹久中。漢州州學教授鬼子儀。知錦州錢元儒。眉州司參軍龐坤載。名山縣尉張權。監德陽縣商稅鄧諫從。新知懷安軍袁柱。新知隆州楊鼎年。知萬州改差制李莊。知梁山軍改程公說。前邛州州學教授避僞去官。又其次也。以上立節之士共三十人。文俱置司參詳官十四人。係見任去官。袁柱以上二人。係不赴新任。死節者一人。權大安軍楊震仲。始終不奉行僞命者一人。成都帥臣楊端明也。其餘拒僞歸朝如劉侍郎甲李校書焯。稱疾不視事如李侍郎寅仲等。尙多有之。曦叛時。以季允持異論。僞帥祿祁令殺之。會其已去。乃得免。



建炎以來朝野雜記乙集卷十

時事二

誅曦將士共轉三十萬官資。復四川將士共轉四萬五千餘官資附。

誅曦功賞自王喜下凡四百二十人。有由副使建節者。有由白身授員郎者。又三路全軍約七萬人。喝轉或三官資。或五官資。入隊人三官資。不入隊人五官資。不大抵共約轉三十萬官資。錫資不計也。復四川功賞自王喜、李好義、張林外。凡一萬三千六百四十六人。共轉四萬五千八百九十五官資。王喜、河池四千六百七十人。共轉二萬三千八百官資。李好義、西和一千一百九十四人。共轉七千八百三十三官資。惠、永鳳州三千五百三十四人。共轉七千一百二十六官資。張林、成州一千九百九十六人。共轉三千三百五十二官資。劉昌國、階州八百三十四人。共轉四千五百三十四官資。以余所聞。河池、成州皆番人。自去鳳州則忠義人取之。階州不取可得。一時推恩大率如此。余又嘗見李御帶好古親錄。實入僞宮人纔一百三十一人。而據楊通判君玉所書。則君玉與楊用朋、李松之徒。止在長史廳伺候告捷。白子申又他之。則實入僞宮人蓋不滿百三十一人矣。自諸軍喝報功賞之後。歲增支總領所錢物約七百八十萬緡。而喝犒不預焉。

誅曦犒賜銀帛數

誅曦犒賜共用金七千兩。金盤蓋一副。金帶五條。金束帶一條。並宣撫司支銀六十一萬七千七百七十兩。六千一百七十五兩。宣撫司支六十一萬二千五百五十五兩。總領所支。絹六十一萬六千九百二十四匹。四千三百一十五匹。宣撫司支六萬二千五百五十引。三千引。朝旨支七萬七千二百五十引。宣撫司支。

金帥言李季章等四人可信

張肖翁之督視江淮軍馬也。遣蕭山丞方信孺往河南行省求和。北帥布薩即十一揆駙馬也許納南使。且禮遣之。信孺既行。揆復使人諭之曰。已奏朝廷。更得安宣撫與西元帥一書乃善。侂胄以書遣安觀文諭旨。安公難之。久之。乃作書如所云。且餉以藥物縑幣。西帥啟緘卻餽。而令鳳翔府路都統使完顏昱作書以來。大略言當聽命于行省而已。時朝廷遣三使入北。一通謝。二告哀。三賀生辰。金亦遣迓使來。已過泗州矣。復卻迴之。曰。皇帝聖旨。南使中惟李璧、吳玕、朱致和、李大性四人言語可信。當遣來議事。今所遣小使且還。玕隆慈之弟。位至少卿節度使。致和嘗以右司郎中出賀。庚申正旦未還。道除司農少卿。俄引年。除直龍圖閣。主管雲臺觀。大性字伯和。南昌人。嘗爲戶部侍郎。玕與致和時皆已死。金又欲朝廷割地損禮。由是不諧云。

李季章所知多佳士

李季章參知政事。以劄子薦蜀士有時望者凡十二人于朝廷。乞召擢守貳四人。黎州楊伯昌。子石泉張

伯願德、隆慶何叔堅固、瀘倅張子和鈞而點、伯昌子和二人。京官四人。興元教授黃子駿申之遂、青神宰楊浩然洪雙流。選人四人。漢州學官詹子能久中、眉州學官張習之狎、余弟仲貫甫亦與焉餘京官選人忘記。後點于駿子能二人得旨皆召。未行。侂胄敗。季章謫。子駿病遘死。三人俱不敢前。制帥楊嗣勳再請于朝。然後促召。時伯願以衛清叔薦。仲貫甫以嗣勳薦。亦有召察之命。浩然後爲黃伯庸所薦。不得召。董仁父入蜀。復上習之節守于朝。乞召察。叔堅歷守長寧、唐安。垂除部使者。告老而去。年纔五十四云。季章所知多佳士。此其選也。

淳熙至嘉定蜀帥薦士總記

蜀帥例得薦士。其始胡長文所薦。如呂周輔、范致能所薦。如胡子遠。亦不過一二人。皆幕中之士。蓋以蜀去天日遠。士非大帥薦揚。無由自進。頃歲趙溫叔初入樞府。楊嗣勳爲吏部侍郎。李季章參知政事。皆嘗特薦士三人或四人。吳曦平後。朝論以蜀士在朝者少。又特召四人。此外郡守已下。非常有朝蹟及進士三人。莫非帥臣所薦召矣。初長文之守蜀也。首薦呂周輔、章德茂二人可用。而召周輔一人。其後留仲至爲守。遂薦黃文叔、馮傳之、李君亮、費戒甫、范文叔等五人。論者翕然以爲當。詔召文叔傳之。餘俟滿秩與陞等差遣。仲至執政。趙子直繼之。獨薦劉德修。子直去。京仲遠爲代。薦費戒甫、游子正仲鴻南充人。又薦劉仲洪、張子良伯源仁壽人。進士廷試第三人。而仲洪子良皆幕客也。陳子長右司損之藉。爲華陽宰。仲至意屬之。而不

與薦由是格不下。會潼川漕趙靜之善譽亦薦張子良于朝。將有命召。或曰：前是大帥所薦不行。而今以

一路監司所薦召之。恐傷事體。時王燕望少監與潼州人。子良同榜進士第二人。為成都石室教授。乃降旨併召二人。若

曰：自以進士高第召之。非由外薦也。其後邱宗卿未及薦而罷去。趙德老為帥。京仲遠當國。乃薦其客馮

叔常履臨邛人。時為崇慶府教授。及李季允、楊濟道濟青城人。時為隆州教授。凡三人。德老後以所厚王齊卿已嚴道人。終國子錄。參之。皆得

召去。自是遂有歲薦之名矣。袁起巖所薦宇文挺臣隆州人。時知隆州。相里公擇寅安仁人。子長。雙流人。時知

東州趙全道大全潼川人。時為簡州。張公甫興祖眉人。時為普州教授。陳叔達遇孫仁壽人。時為潼川路提刑。司檢法官。凡六人。朝廷不能

盡召。乃詔挺臣公擇俟秩滿赴行在奏事。少才全道俟終更赴朝堂審察。公甫叔達俟滿日特轉一官。自

是歲薦有不召者矣。劉仲洪為人固非長者。然所薦劉師文甲渤海人。寓居達州。今寶謨閣直學士。張伯修從祖江源人。新

監作少宋正仲德之晉原人。嘗為太常丞。今為湖北提刑。李仲衍興宗洛陽人。寓居鄆都。終國子博士。四人俱時望。謝用先所薦費思甫士幾。廣都人。時知重

慶張東甫震龍湖人。時為制置司幹辦公事。扈叔誼仲榮江源人。時簽書大安軍判官。廳公事。許子然沈瀘州人。時為合州教授。凡五人。思甫

乃參政戒甫之族。叔誼與戒甫連姻。思甫以嫌除直祕閣。餘人皆召察焉。程東老在蜀最無足云。而所薦

陳逢孺、李仲衍、薛仲章絳龍游人。時為宣撫司幹辦公事。范少約子該。雙流人。時為武學。諭丁憂。張義立方資陽人。類嘗試第。一時為普州教授。楊叔禹汝

青神人。進士甲科。皆知名。東老時為宣撫制置使。乃盡召之。楊嗣助薦子弟仲貫甫。及程叔達、趙信道希

宗室。寓居合州。而又申言程東老、李季章所薦不敢行者六士。范少約、楊叔禹、張義立。于是有旨趣行。蓋九人也。

安子文方爲宣副。同時薦八士。章甫上會其閒蓬守杜慶長。源昌人。以上僞表爲中執法所劾。竄臨賀。由是報聞。久之。乃獨召字文子仁。聞仲。雙流人。今爲大理司直。蓋挺臣力也。吳德夫爲制帥。薦李仲可。嗣文。依政人。知雅州。何仲弼。德綿竹人。通度周卿。正。巴州人。知華陽縣。何從叔。應龍。昌元人。監成都糧料院。李思行。鳴鳳。陽安人。隆州教授。何李皆類試第一人。思恭德修子。仲弼已選。知黎川。四人皆召。仲可得旨。與監司差遣。俟命一年餘。乃除利路轉運判官。周卿嘗謁朱晦翁于建陽。從之。彌月。德修每爲之延譽。德夫又力薦之。乃進一官。曾君錫舍人論之。命遂寢。明年子文改除制置大使。乃薦崇慶李季允。幕客趙公開。希濬。寓居石盤。嚴道楊叔正。秦之青神人。普州學官張益父。巴之遂寧人。成都帥屬王才臣。後。廬人。凡五人。季允歷官館學。累爲藩帥部使者。不當在歲薦之列。叔正少勁直。爲楊嗣勳所知。方吳曦亂時。嗣勳與其父書。有令嗣拂袖徑去。真名父之子。輔所以不欲與聞其去。想蒙悉察之語。子文得其墨本。爲繳進。益父嘉定元年進士。今尙初官。同時廷試第一人。前省元未召也。才臣喜爲詩。以江西帥使者特薦得官。不由科目。且非蜀士。議者以爲非前比。章上數月。乃召季允。與別議差遣。公開增一秩。叔正益父召察。才臣俟終更。與陞等差遣。會成都提刑林與之以不應副利店事。與帥臣黃伯庸異論。召去。乃命季允爲本路提刑。特免避產業云。與之名潔。已永嘉人。祖待聘。紹興給事中。于是伯庸以得旨咨訪西蜀吏治。亦薦士三人。曰何仲弼。楊浩然。洪虞子詔。剛簡。浩然。雙流人。故爲德修諸人客。時通判潼川府。子詔。雍公孫。屢舉進士。時知永康軍。朝論以一路帥未嘗有薦士者疑之。伯庸移書執政。援前旨。

爲詞。仲弼先已召會朝士多知子韶。乃降旨浩然。秩滿與陞等州郡。子韶令赴都堂審察。自嘉定以來。蜀之宣撫安撫。制置三司。皆得薦士。亦非常制云。

四川大制司結局

沔州自誅曦後。王喜。王鉞。薛九齡。皆以宣撫司便宜之命爲都統制。己巳之秋。王大才始以荆。鄂。都統制。改除入蜀。大才過漢中。自以嘗權招撫使。不欲與大使講塔堦之禮。安大使不從。大才憾焉。先是戊辰之冬。金主璟卒無子。其季父衛王允濟立。允濟嘗使蒙古。不爲其主所禮。憤之。及允濟立。蒙古始叛。辛未之秋。朝廷遣余郎中嶸北使。賀所謂萬秋節者。而燕京已爲蒙古所逼。不暇延使者。余郎中至涿州而還。癸酉之秋。允濟爲其臣赫舍哩執中所弑。璟之庶兄。鄂王珣代立。董舍人居誼爲賀生辰。使至沃州而還。繼而賀登位。使真舍人德秀。正旦。使李舍人屋繼。抵盱眙。金不克迓。議者言金有內難。議論紛然。朝廷聞之。以御札賜大使及大才。令益謹守備。毋啟邊釁。有迪功郎提舉阜郊博易鋪務兼大使司簽廳何九齡者。廣安鬻爵人也。據結忠義人。謀取秦州。未發前八日。金先知。以檄至秦州詰問。丙寅除夕。九齡遂率沔州中軍統制強德等。以所部夜襲秦州。甲戌正月朔旦。敗焉。十六日壬午。大才執九齡及諸將等七人。斬之。以其事聞于朝。且檄報鳳翔都統使。仍關牒川陝西路監帥司。又遣人往廣安。捕九齡之子世昌。亦斬之。會大使司奏大才圖爲宣撫使。設意傾陷。今邊報不一。或有緩急。必致誤事。二月十九日甲寅。詔大才特

降一官。三月二日丁卯。大使除同知樞密院事。不日起發赴院治事。新成都路安撫董侍郎居誼。除四川制置使。疾速前去之任。知潼州府劉侍郎中。除利路安撫使。時暫權制置司職事。限一日起發。皆未受命也。會大使司遣使臣李大亨。王頤往阜郊。逮大才所遣秦州打話人赴興元問狀。四日己巳。過沔州市。大才執大亨斬之。縱頤歸報。後二日辛未。乃以悖語至大使司。武功大夫福州觀察使沔州駐劄御前諸軍都統制兼知沔州王大才。今具相公不顧法令。非理割下大才事。自開具下項。一入謀大才與金人同謀不軌。一入謀大才與金人私通書信。一入謀大才于廣安軍殺何九齡之子世昌。一入謀大才將兵劫掠到銀七十三錠。金一百五十兩。已納在大才宅庫。一與元都統李太尉密與大才下書。虞候孫儀言說稱相公已刷差下二千五百人。要親來沔州將大才殺害。二相公日來不時遣使強橫小人以追人為名前來門首厲聲叫鬧。呼來庭下。將大才百端屠戮。靡所不言。此何理耶。未嘗有敗壞朝廷紀綱法令。端自相公為始。伏乞鈞照。利害至重。而又不遵宸翰約束。其所賜御札。詔墨未乾。輒敢反亂朝廷。何所不為。所有何九齡已從條法誅斬了當。獨相公未蒙朝廷施行。如何反將忠臣義士入謀以不赦之罪。公然形于紙筆。以快私意。天下恐無此理。可見相公包藏禍心。欺罔君父。蔑視朝廷。不恤人言。略無忌憚。未審相公端用幾日。前來沔州作亂。乞賜明文。行下。容大才道左。祇候公參。謹具申制置相公。敢望鈞慈。憫念朝廷。勿以天日萬里。以為可欺。況惡業貫盈。恐造物不與善後。特未可保。伏乞鈞照。開正識。眼曲賜看詳。嘉定七年三月初六日。八日癸酉。大使得之。即疏辯申朝廷。且檄四路帥臣監司。委究其實。十一日丙子。董侍郎至石首縣。被制置使之命。而十七日壬午。大使被同知之命。同日劉侍郎亦被權司之命。而二十五日辛卯。乃借用潼川府觀察使之印。交割制置司職事。徑至興元。四月十九日癸丑。安同知發興元。申乞以剗賣鹽引錢三十萬緡。充沿路喝犒諸軍之用。不待報。遂行。五月十八日壬午。金主珣為蒙古所迫。渡河而居汴京。至六月二十日癸丑。安同知自廣安起行。順水而赴行在。至八月十六日戊

申安同知除觀文殿學士知潭州。二十一日癸丑。安同知方行至廣德軍。乃得邸報。五十五日丁巳。始還。次于黃池鎮。知被新除之命。因上疏力辭。優詔不允。乃遣官賣結局進冊赴行在。蓋自丁卯二月一日乙亥。值吳曦誅。安公遂權宣撫使。至甲戌四月十九日癸丑。而制置大使司乃結罷。凡共六千六百有一旬有八日云。于是制置使還成都。而興元帥臣依兩淮例。兼節制御前軍馬。稍得與聞邊政。大才貪庸凶悖。制置使既不得其柄。反倚重焉。失朝廷臨遣之意矣。